

Süchen die ler vnd nit das gelt  
Wißheytt ist besser dann all welt  
Vnd alles das man wünschen mag  
Stellen noch wißheytt nacht vnd tag  
Nüt ist / das ir glich vff der erd  
In rätten ist wißheytt gar werdt  
All sterck vnd all fürsichtikeyt  
Stot zü mir eyn / spricht die wißheytt  
Durch mich / die kunig hant jr kron  
Durch mich / all gsatz mit reht vff ston  
Durch mich / die fürsten hant jr landt  
Durch mich / all gwält jr rehtspruch häd  
Wer mich lieb hat / den lieb ouch ich  
Wer mich frü sucht / der fyndt mich  
By mir ist richtüm / güt / vnd ere  
Mich hat besessen gott der herre  
Von anbegynn in ewikeyt  
Durch mich hatt got all ding bereit  
Vnd on mich ist gar nüt gemacht  
Wol dem / der mich allzyt betracht  
Dar vmb myn sün nit synt so träg  
Sellig ist der gat vff mym wäg  
Wer mich fyndt / der fyndt heil vnd glück  
Der mich hasst / der verdyrbt gar dick  
Die plag wurt vber narren gan  
Sie werdent wißheytt sehen an  
Vnd den lon / der drum ist bereit  
Vnd werend wurt in ewikeyt  
Das sie inblütend vnd selbst sich  
In jamer nagent ewicklich



more  
B. lt d  
D. 2 m